



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.22/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Kymete Kicaj, kryesuese, Skender Çoçaj dhe Arsim Hamzaj anëtarë, duke vendosur lidhur me ankesën e parashtruar nga Subjekti Politik Kosova Demokratik Turk Partisi (KDTP), me seli në Gjilan, paraqitur kundër vendimit të Komisionit Qendror të Zgjedhjeve (KQZ) Nr.01/2348-2025 të datës 06.09.2025, për Miratimin e Përbërjes së Këshillave të Vendvotimeve në Vendvotimet e Rregullta dhe me Kusht, për Zgjedhjet Lokale në e Republikën e Kosovës, që do të mbahen më datë 12.10.2025, në seancën e panelit të mbajtur më datë 10.09.2025, mori këtë:

V E N D I M

REFUZOHET e pabazuar ankesa ZL.Anr.22/2025 e datës 08.09.2025 e parashtruar nga subjekti politik Kosova Demokratik Turk Partisi (KDTP), me seli në Gjilan, të paraqitur ndaj Vendimit të Komisionit Qendror të Zgjedhjeve KQZ, Nr.01/2348-2025, i datës 06.09.2025, për Miratimin e Përbërjes së Këshillave të Vendvotimeve në Vendvotimet e Rregullta dhe me Kusht, për Zgjedhjet Lokale në Republikën e Kosovës, që do të mbahen më datë 12.10.2025.

A r s y e t i m

Më datë 08.09.2025, Subjekti Politik Kosova Demokratik Turk Partisi (KDTP), ka paraqitur ankesë në PZAP, me të cilën pretendohet se KQZ, ka nxjerrë vendim me të cilin është përcaktuar përbërja e Këshillave të vendvotimit, në të gjithë territorin e Republikës së Kosovës, ku sipas këtij vendimi Këshillat e vendvotimit përbëhen nga 5 anëtar, me përjashtim të Komunës së Prizrenit, Mitrovicës së Veriut dhe Gracanicës, të cilat për shkak të numrit të komuniteteve jo shumice kanë nga 6 (gjashtë) anëtarë, duke shtuar se si subjekt janë dëmtuar shumë. Tutje shtojnë se KDTP është e përfaqësuar në Kuvendin e Kosovës më 2 (dy) deputet dhe në të gjitha proceset zgjedhore të mbajtura në Komunën e Gjilanit, KDTP ka pasur të drejtë të përfaqësohet në secilin këshill të vendvotimit me nga një anëtar, duke pasur gjithsej 130 (njëqind e tridhjetë) përfaqësues në këshillat e vendvotimeve. Duke i propozuar kështu PZAP-së, që ta aprovojë kërkesën dhe çështjen ta rikthejë në KQZ, me udhëzim që çështja të ndryshohet, ashtu që njësoj si në Komunën e Prizrenit, Mitrovicës së Veriut dhe Gracanicës, edhe në Komunën e Gjilanit Këshillat e vendvotimit të përbëhen nga 6 (gjashtë) anëtar, duke i mundësuar që anëtari i gjashtë të përfaqësohet nga KDTP.

KQZ në përgjigje në ankesë ka theksuar se, gjatë vendimmarrjes KQZ, është bazuar në nenin 64 paragrafi 2.10, nenin 75,76, dhe 77, të Ligjit Nr.08/L-228, për Zgjedhjet e Përgjithshme në Republikën e Kosovës, si dhe nenin 2 paragrafin 2, 3 dhe 4, neni 3 paragrafi 1, paragrafi 2, nën paragrafi 2.1, dhe 2.2, paragrafi 1,2,3,4 dhe neni 3 paragrafi 1,2 nën paragrafi 2.1 dhe 2.2 të Rregullores Zgjedhore Nr.11/2024 Këshillat e Vendvotimeve.

Tutje kanë shtuar se pretendimet e palës ankuese se vendimi i KQZ-së, nr. 01/2348-2025, për Miratimin e Rekomandimit për Përbërjen e Këshillave të Vendvotimeve të Rregullta dhe me Kusht, për zgjedhjet Lokale që do të mbahen më datë 12.10.2025, në Republikën e Kosovës janë të pabazuara sepse KQZ gjatë ndarjes së vendeve në Këshillat e Vendvotimeve është mbështetur në nenin 3 paragrafi 1 të Rregullores Zgjedhore Nr.11/2-024, për Këshillat e Vendvotimeve sipas të cilit përfaqësimi në KVV u takon: subjekteve politike të certifikuara të cilat kanë kaluar prapun zgjedhor në zgjedhjet e fundit nacionale. Në përgjigje kanë theksuar se subjektet të cilat e kanë kaluar prapun zgjedhor janë: Lëvizja Vetëvendosje (42.30%), Partia Demokratike e Kosovës (20,95%), Lidhja Demokratike e Kosovës (18.27%), Aleanca për Ardhmërinë e Kosovës (7.06%). Kështu që duke u bazuar në nenin 3 paragrafi 1 të Rregullores Zgjedhore Nr.11/2024 Këshillat e Vendvotimeve, Përfaqësimi në KVV “KQZ fton subjektet politike të certifikuara të cilat kanë kaluar prapun zgjedhor në zgjedhjet e fundit nacionale që të nominojnë nga 1 anëtar të KVV-vë”. Po ashtu në ankesë kanë theksuar se pretendimi se subjekti politik KDTP duhet të trajtohet në mënyrë të barabartë me subjektet e mëdha në Kuvendin e Republikës së Kosovës hidhet poshtë për arsye se ky subjekt garon vetëm për vendet e rezervuara sipas Kushtetutës së Kosovës, neni 64, paragrafi 2, nën paragrafi 2.

KQZ ka marrë për bazë edhe paragrafin 4 të nenit 77, të Ligjit për Zgjedhjet e Përgjithshme, i cili i jep kompetencë KQZ-së se pavarësisht paragrafit paraprak të këtij neni, në rast se kërkohet, KQZ-ja ka kompetenca për të emëruar sipas zgjedhjes së saj anëtarët e KVV-ve të cilët nuk përmbushin kushtet sipas këtij neni. Në përgjigje në ankesë KQZ ka theksuar se subjektit politik KDTP në Komunën e Gjilanit i ka ndarë 28 anëtar të KVV-ve, dhe 3 anëtar rezervë, gjithsej 31 anëtar që do të thotë se ky subjekt është i përfaqësuar në Komunën e Gjilanit, përkundër faktit që në Komunën e Gjilanit sipas regjistrimeve të fundit janë të regjistruar 745 banorë të komunitetit turk.

Si dëshmi kanë bashkëngjitur vendimet e KQZ-së për ndarjen e KVV si dhe raportin e fundit të Agjencisë të Statistikave të Kosovës, për regjistrimin e popullsisë. Andaj, në bazë të neneve të lartcekura, konsiderojnë se ankesa e ankuesit, është e pa bazuar dhe si e tillë duhet të refuzohet.

Paneli, pas shqyrtimit të ankesës të parashtruar nga ankuesi, gjeti se:

- Ankesa është e pa bazuar

Pretendimet e palës ankuese se Vendimi Nr.01/2348-2025, i datës 06.09.2025 për Miratimin e Përbërjes së Këshillave të Vendvotimeve në Vendvotimet e Rregullta dhe me Kusht, se vendimet e kontestuara të KQZ-së janë në kundërshtim me Ligjin për Zgjedhjet e Përgjithshme në Republikën e Kosovës, Paneli i vlerësoj si të pabazuara për faktin se me dispozita ligjore janë përcaktuar qartë përbërjet dhe funksionet e KVV, ku shprehimisht dispozita e nenit 77 par.3 i Ligjit për Zgjedhjet e Përgjithshme, parasheh se *“Kryesuesit e këshillave të vendvotimeve zgjidhen në mënyrë të barabartë në mesin e katër (4) subjekteve politike të certifikuara që kanë fituar numrin më të madh të votave për Kuvendin e Kosovës gjatë zgjedhjeve të fundit në atë komunë”*, ndërsa paragrafi 4 i këtij neni thekson se *“pavarësisht paragrafit paraprak të këtij neni, në rast se kërkohet, KQZ-ja, ka kompetenca për të emëruar sipas zgjedhjes së saj anëtarët e KVV-ve, të cilët nuk i përmbushin kushtet sipas këtij neni”*.

Po ashtu pretendimet e palës se Vendimi Nr.01/2348-2025, i datës 06.09.2025 për Miratimin e Përbërjes së Këshillave të Vendvotimeve në Vendvotimet e Rregullta dhe me Kusht, se vendimet e kontestuara të KQZ-së janë në kundërshtim me Rregulloren Zgjedhore nr.11/2024, neni 3 paragrafi 1 në të cilin shprehimisht thuhet *“KQZ fton subjektet politike të certifikuara të cilat kanë kaluar pragun zgjedhor në zgjedhjet e fundit nacionale, që të nominojnë nga një anëtar për KVV”*.

Pas verifikimit të provave të bashkangjitura në shkresat e lëndës dhe përgjigjes së KQZ-së, paneli vërtetoi se subjekti politik, KDTP, sipas vendimit nr.01/2384-2025 të datës 06.09.2025, për Përbërjen e Këshillave të Vendvotimeve të Rregullta dhe me Kusht, subjektit politik KDTP i ka të shtuar 28 anëtar të KVV-ve në komunën e Gjilanit dhe 3 rezervë, gjithsej 31 që do të thotë se ky subjekt është i përfaqësuar në Komunën e Gjilanit, përkundër faktit që në Komunën e Gjilanit sipas regjistrimeve të fundit janë të regjistruar 745 banorë të komunitetit turk.

Bazuar në të lartcekurat paneli vlerëson se KQZ ka bërë shpërndarjen e KVV-ve në vendvotimet e rregullta, me kusht dhe ekipet e numërimit në QKN në bazë të kriterëve dhe kushteve të përcaktuara me ligj dhe aktet nënligjore ku ndarja është bërë duke trajtuar në mënyrë të barabartë për të gjitha subjektet politike në mënyrë që kjo përfshirje të reflektoj pjesëmarrjen e barabartë për të gjithë ata që marrin pjesë në procesin zgjedhor.

Përfundimisht paneli nga PZAP ka gjetur se KQZ-ja ka vendosur në mënyrë të drejtë dhe të barabartë për të gjitha subjektet politike, duke u bazuar në dispozitat ligjore në fuqi, si për subjektet që kanë fituar numrin më të madh të votave në zgjedhjet e fundit, e po ashtu edhe për të gjitha subjektet tjera pjesëmarrëse dhe se mbi këtë arsye të njëjtave nuk iu është bërë ndonjë padrejtësi me vendimin nr.01/2384-2025 të datës 06.09.2025, për Përbërjen e Këshillave të Vendvotimeve të Rregullta dhe me Kusht, në këtë kontekst duhet pasur parasysh edhe dispozitën ligjore nenin 77 par.4 të LZP-së e cila i jep të drejtë KQZ-së, për të emëruar anëtarë të KKV sipas zgjedhjes së saj, pa marrë parasysh numrin e votave të fituara në zgjedhjet e fundit dhe me Rregulloren Zgjedhore nr.11/2024, neni 3 paragrafi 1.

Prandaj, nga arsyet e paraqitura më lart dhe në pajtim me nenin 13 paragrafi 2 të Rregullores së PZAP-it Nr.01/2024, për Procedurën e Shqyrtimit dhe Vendosjes së Ankesave, nenit 3 paragrafi 1 të Rregullores së PZAP-it Nr.11/2024 për Këshillat e Vendvotimeve, si dhe nenit 118 paragrafi 1 i Ligjit për Zgjedhjet e Përgjithshme në Republikën e Kosovës, Paneli vendosi si në dispozitiv të këtij vendimi, duke i refuzuar ankesën si të pabazuar.

Paneli Zgjedhor për Ankesa dhe Parashtresa

ZL.Anr.22/2025, datë 10.09.2025

Kryesuese e Panelit

Kymete Kicaj



Këshilla Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.